



OMUKWETU



Oshifo shOngerki onkwaevangeli paLuther yomOwambokavango/Die Tydskrif van die Evangeliese Lutherse Ovambokavango Kerk

No. 22

NOVEMBA

1967



Ngele itamu ishonopeke mu fe aanona, itamu thigulula oshilongo shegulu.

JESUS OKWA TUMWA OMUMANGULULI

Kalunga okwa tumu Jesus mu-yuni, opo a mangelule ayehe mboka taa ende momuzizimba gweso ya kale ye nomwenyo muKristus.

Tate omushiti nando Omupanguli omuyuuki okwe tu pe esilohe-nda, sho tu na Jesus onzapo yohole yaKalunga, twaa pangulilwe mekano.

Ehalo lyaKalunga olyo ndika kaa-ku kane nando gumwe gumwe, aawe ayehe ya kale ye nomwenyo gwomu-Jesus.

Oshinima tashi ehameke Kalu-nga osho eso lyomukeenakalunga, i-nali mu opalela. Ota ti: "Onda hala omukeenakalunga ti itedhululile omi-kalo dhe, ye eta kala e nomwenyo ita pangulilwa mekano." Joh.5:22-29.

Omuntu ngoka inaa taamba Jesus ini itedhulula, noshaa ngoka ini itaa-la omwenyo gwaaluhe tagu zi medhi-mo po lyoondjo muKristus, oye o-kuwa pangulwa.

Osondaha ndjika otayi tu dhi-mbulutha kutya. Kalunga ote ya a pangule uuyuni muJesus Kristus. Tu endebele mbala tu itedhulule tu ye ku-Jesus, oshoka ethimbo lyoopala o-ngashingeyi.

Jesus awike ta hupitha mekano nota fala aalunde yi itedhulula mo-mwenyo gwaaluhe.

Ila tuye kuJesus ngoka te tu shi-tulula tu ninge aana yoshilongo she-gulu. Amen.

Malakia Alugongo.

ESHIIVIFILO

Paife efimbo ola fika, ovo mwa hala mu leshe oshifo shOmukwetu omudo tau uya 1968, mu lishangife nde mu mbeshitele divadiva oshifo sheni. Tu endeeleni diva fimbo inatu uya pexulilo lomudo. Oikwatakwata ohai nyika edilo, ino tokelwa vali ngoudwaali.

Ou iho tambula shito oshifo, dja-mo meemhofi nde mbeshitela diva. Ou iha lesa oshifo okwa fifikina.

Oshifo shOmukwetu otashi landwa kodula 60c mOwambo, kOushimba nOkavango 80c molwostombe. Oshifo shEhangano otashi landwa momudo 15c mOwambo, kOushimba nOkava-ngo 20c molwostombe. Tu endebele divadiva!

OMULAULE OTA POPIWA LUHAPU

Ngenge to valula oitya "omulaule" oyo to mono ya shangwa moifo noto i udu moradio efiku nefiku efimbo nef mbo omudo nomudo, oto mono shili kutya, oshitya omulale otashi popiwa luhapuhapu. Onghalo pokati komutilyane nomulaule ya fa inai fika naanaa ngaashi i nokukala nonghene ekondjo neemhangela neenghundafana dokutula peenhele onghalo yopokati komaluvuala aa avali otadi yandje oilonga, unene kovapangeli voilongo nomolwasho omulaule ota kundafanwa paife unene. Kombinga imwe sha fa tashi faneke kutya, Kalunga okwa hala okushakenifa osho a hala ye mwe ne, osheshi ota shiiva nghene e nokuninga eshito laye alishe lokombada yedu.

EPANDULO LETU OLINENE

Ofye ovanyasha meongalo Okalongo, ohatu pandula unene ookaume amushe mwe tu tumina omaano eengalo. Otwa li twa hala keshe umwe tu mu shangele ombapila tu mu pandule, ndele eshi mu li po vahapu, ohatu shi ningi mOmukwetu.

Otwa pandula ove meme Josefina Shekunjenge, Engela, R1.00 yetu we tu tumina oya fika. Meme Mirjama Shikololo, otwe ku pandula, ehangelapya olo we tu kongela moNakayale R1.00 ola fika. Samuel Haileka, Oranyemund, otwe ku pandula R1.00 we tu tumina, oya fika. Ovamati mu-Windhoek 16, otwe mu pandula, osheshi R5.80 oyo mwe tu pa oya fika nawa. Meme Olivia Hamalua, R4.11 we tu tumina oya fika, kulupa nome-sho. Meme Ottilia Kaholongo kuHelsinki, otwe ku pandula unene kaume, omambo mawa eenote tae tu kwafa shili, okwa fikifwa nawa kumeme Aune Shilongo. -Amushe otwe mu halela epuniko lOmwe ne. Ponhele yongudu: Abraham Haileka, Nd. N. Shilumba.

OMUBISHOFI

Kimberley. - Omubishofi mupe waKimberley naKuruman, ota ka hoololwa eti-9Desemba neudo nde oye omubishofi Crowther.



Ame onda fikama poshivelo nde ohandi konghola! Yeulula omuvelo ndi ye mo momwenyo woye!

OFIKOLA YAUDIAKONI


Epangelongerki ola tokola moshongalele shalo 24. 5. 1967 kutya, 1968 ofikola youdiakoni otai ka tambula ovalongwa vape notaku teelwa oukadona.

Medina lEnongelo Lovayakuliongalo ohandi shiivifa:

1. Oukadona ava tava ka tambulwa ove nokukala va pita St. 6,
2. Ove nokukala ovaitaveli ve nehalo okuyakula momaongalo,
3. Ou a hala okutambulwa na tume
 - ombapila yeongalo
 - ondombwedi ya St. 6
 - epopilo lomufita
 - epopilo lomulongi ou e mu longa muSt. 6
 - ondombwedi youkolele
 - ehokololo lokukalamwenyo kwaye
 - eindilo lokutambulwa

4. Ekonakono otali ka ningwa mEnongelo Lovayakuliongalo mEngela mefiku eti-25-26 Januari 1968.

MEngela 18. 10. 1967
Enongelo Lovayakuliongalo
pp. Väino Simojoki.
Omukulunhu



Mefano Bengt Simonsson ota fatululile Moses Amkongo womOniipa mefimo loshoongaleleskola muJohannesburg

OSKOLA YAAVALITHIPANGI MONANDJOKWE

Otayi taamba aalongwa aape.

Aakadhona mboka ya pita "Junior Sertifikaat" taa tameke esiku 2 Januari 1968 notayi ka kalwa omimvo mbali netata.

Aayakupangi ya piti ekonakono lya "S.A. Verpleegstersraad" naakadhona ya pita "Matriek" taa tameke esiku 1 Febuluali 1968 notaa kala omimvo mbali.

Aalongwa taa ka longwa mOshiafrikaansa nomakonakono ga "S. A. Verpleegstersraad" taga nyolwa wo melaka ndyoka.

Ayehe mboka ya hala okutameka oskola naa tume oombapila dhawo kOnandjokwe manga esiku 1 Desemba 1967 inaali thika.

Kehe gumwe tuma:

1. Ombapila yeindilo lyoye mwene.
2. Onzapo yegongalo.
3. Onzapo yahuginina yoskola, (St. VI, Junior Sert. nenge Matriek).
4. Epopilo lyomukuluntu gwonasaresa nenge oskola moka e li.
5. Onzapo yuukolele.

Oshilonga shika oshinene noshidhigu ihe "Waa kambadhala ku sindi." Omukuluntu gwoskola.

Johannes Eliakim Swakopmund ota ti: Otatu hambelele Tate Kalunga nOmukulili gwetu Jesus, osho twa pewa etalaleko koomwenyo dhetu, dha li dha sa oluteni nodhaa na evululuko. Omuwa oye mwene he tu sile oshimpwiyu shomeya niikulya yokoomwenyo. Otse inatu hala nando okutopoka noohapu dhOmuwa, oshoka odho

uuyelele mondjila yetu. Uuna tatu vulwa Omuwa mwene te tu nkondopeke nomauvitho gaamati ye.

Otatu halele omuyevangeliste gwongerki oonkondo nuupenda weitaalo nowoshilonga she, otse mbaka yomuSwakopmund twa li twa kala naye poompadhi dhOnziona.

OVALAULE TAVA LONGWA OKUNYOLA

Oinyolwa yeengerki luhapu oya shangwa nai, ya shangwa kovanashilonga ile kuovo vehe fi ovanashilonga, hava longifa omikalo da kulupa ile inava shiiva okushanga nawa. Eshii-vifondunge eli ola popiwa kOmusweden, ou paife oilonga yaye oyoku-kwafa nokulonga ovalaule mongongadu aishe yAfrika, va dule okushangela eengerki davo oinyolwa youkriste iwa.

Oye omushamane Bengt Simonsson, omushangi mukulu nde paife oye omuwiliki woskola yokulonga ounongo wokunyola oinyolwa youkriste. Ovalongwa ohava di meengerki domaitavelo e lili noku lili. Okwe ile kuJohannesburg nde okwa ningila ovalaule eetundi doinyolomwa mefimbo loivike itatu, eshi a ifanwa kehangano loinyolwa youkriste laSuid-Afrika.

Omushamane Simonsson okwa tumbula vali a ti: Ovatilyane novalaule momaudifo nomokushanga ohava longifa elaka languda, olo itali tungu sha pefimbo lonena. Ndele otwa hala okulonga ovanhu, opo va nyolele no-va longe vakwao nawa pafimbo.

Okwa tumbula vali: Okunyola nawa ohatu ku kufile efimbo ku longwe nawa. Meengerki otwa hala tu mone ovalaule tava shangele ovalaule vakwao vovene, ponhele yovatumwa. Oskola yoinyolwa kuKitwe, oyo aike yoludi eli muAfrika paukwatya wayo, kai nokatongo nde oya totwa painedilo lopamhumbwe lovalaule, ovo ve udite va hala va longwe ounongo wokushanga.



Okangudu koumatikadonaongalo mOutjo. "Longeleni Omwene nehafo."

OMOLWASHIKE WA EHAMEKWA

Nghe wa dalwa owa mona omunhu ta ende komesho yoshihauto sha manamo? Owa mona omunhu a lyatwa koshihauto? Owa mona omunhu ta tula eke laye momundilo, nde wa mona omunhu a pya komundilo?

Atushe otwa shiiva, ngenge u-mwe ta hetekele okweenda komesho yoshihauto sha manamo, ota lyatwa ndishi? Atushe otwa shiiva yo, u-mwe nge ta tula eke laye momundilo, ota pi. Ndelene ovanhu vahapu shiimba inava shiiva kutya, ope na natango omikalo omulongo, odo nge hatu di ningi ohatu hangwa koshiponga. Ombibeli oya popya kutya, ngenge hatu longo oinima oyo omulongo, ohatu mono oshiponga. Oinima omulongo oyo ei:

1. Okudipaa omunhu,
2. Okunyona nomukainhu womunhu ile okunyona nomulumenhu womunhu,
3. Okuvaka po oinima yovanhu,
4. Okupopya ovanhu eendjovo dihe fi doshili,
5. Okuhala oinima ihe fi yoye,
6. Okuhafiloshisho xo nanyoko,
7. Okuhadimbuluka Kalunga nandenande,
8. Okutongela edina laKalunga oinima yongaho,
9. Okulonga oshinima (nde to ti osho Kalunga,
10. Okufimaneka oikalunga ponho yaKalunga koshili.

Ovanhu vamwe ohava ti: Ame nge handi longo oinima ei, itandi monika, oshiponga otashi hangele nge peni?

Ngenge ovanhu ohava popi ngaha, ova dimbwa oshinima shimwe. Ova dimbwa kutya, meni lomunhu keshe omu nondaka hai nyenyeta. Ngenge hatu longo imwe yoinima ei, ondaka oyo yomomwenyo otai handuka. Unene ohai handuka nde hai tu nyenyetele ngenge hatu longo oulunde. Ondaka oyo ito dulu oku i henuka.

Osho yo ondaka ei nge ye ku handukila, naave ito kala nombili, nokuli fiku limwe oto hovele okuvela. Ovanhu vahapu otava vele molwoshinima eshi. Osho ngenge ohatu longo oinima ei i li omulongo, nena noiponga itai tu efa. Osha faafana naana nomunhu ta ende komesho yoshihauto sha manamo, ou ta mono shili oshiponga.

L. M. Sh.



L. Aho, Kongo ota yandje omakundo a dja 'mOwambo kovamati vomehalakano mOushimba Ovenduka.



Tala Odyona yaKalunga tai humbata etimba loye!

ENYANYU

Oku na esiku limwe hali nyanyudha aanona naakuluntu wo komeho gomasiku omakwawo. Olyo esiku lyOkrisimesa. Enyanyu lyOkrisimesa olyo enene shili, oshoka mulyo omo tuu moka Kalunga ta holola ohole ye okuhola aantu. Oye sho te tu tumine Jesus Kristus omwana awike muuyuni, opo tu kulilwemo mepangelo lyasatana. Joh. 3: 16. Shika osho omagano omawanawalela.

EWI

LYEVANGELI

MORADIO

Otundi 8.30 ongulohi

Ometa 31

19.11.67 G. Shangheta.

26.11.67 Lukas Dama.

17.12.67 Omaimbilo nowandaha omumbisofi L.Auala.




ESHINA LA LYATA OKAANA

Port Elizabeth. - Okaana okakadona oka lyatwa keshina nde omudimba wako owa hangwa molutenda moshashiyona. Omudimba owa konakonwa nde kwa monikwa kutya, oka lyatwa naanaa pokati.

Omunona na ngoye onda gwana ndi ku pule ngeyi: Ou li po tuu u li meilongekidho lyasha okutegelela Omuwa goye, sho te ku etele omagano omawanawa? Taku tiwa: ilongekidheni oshoka ethimbo nesiku kamu li shi Omuwa te ya! Ano sho nda fa nde ku londodha ngeyi, ngoye omukwetu ilongekidhila shili omuyenda goye oye tuu Jesus Omukulili goye u mu taambe. 1Tess. 5:1-2.

M. M. Amoomo

AAGUNDJUKA OSHO YA LI MOSHIGONGI SHAWO MONAKAYALE



Mesiku lyetameko lyoshigongi aagundjuka oye li momikweyo ya yelutha omapandela okuuka kongerki.



Aagundjuka Aakavango oya li wo moshigongi nepandela lyawo. Ebandela oli nendhindhiliko lyafa ndyoka li li keimbilo epe.



Aagundjuka Aaniipa mboka ya yile koshigongi.



Omapandela gaagundjuka otaga monika mefano ge li kowalitali.



Oshihauto shomusamane Leonard Mukwilingo she eta aagundjuka yomuElim nAaniimwandi.



Aagundjuka taa ipalutha nontaku pethimbo lyomulongo.




Eestombe mbali dokudimbulukifa oshivilo sheyelifo leitavelo shomido 450, oda yandjwa kepangelo lopoosa laSuid-Afrika. Omutwe waMartin Luther otau monika mostombe yeesendi 2 1/2. Kostombe ikwao yeesendi 12 1/2, otaku monika omuvelo wongerki yomuWittenberg, oko Luther a pamhela omatomhelo aye 95 eti-31 laKotoba 1517.

ONYAKANYAKA YA HOLOKA MUATLANTA

Atlanta (Georgia).- Ovapolifi ova keelela ongudu imwe yokuta oupeko (oukalata) nde oya kwata po umwe waovo va li tava te oupeko. Ongudu ikwao oya handuka unene novanhu vahapu va ongala ponhele oyo no-

nyakanyaka oya ninga yakula. Kwa hokololwa kutya, ovanhu vamwe ova kwatwa natango.

☞ Oupeko ohava tewa unene keembwiti, keetyotyishondolo noko omutwemwapwa. Ohaku likolwa oimaliwa nde unene kwa shiivika kutya, oupeko ohava eta omalwoodi nde ohava mbulula omunhu.



Oshimbodi u wete mefano, osho embo. Ovayebele hava ti "omambibo." Omambo oshikulya shikulu shomuyebele. Eshi ho mono hava ende noushe, ovokufa omambo avo. Omambo haa ningi omatindi manene. Omeva embo oku nounyenye woshikwafuka.



Aamati to mono mefano, oyoshigongi shaagundjuka muKleinWindhoek.

Ila kuJesus, u gundjile, Hedha ko ondjendi, u hupithwe.

Ila kuJesus a dhime po, Oondjo adhihe, u hupe wo.

KANDI WAPA OKUMWENA

Onda kala nuwehame tau kama ndje oomvula omugoyi. Onda kala ethimbo ele tandi kongo ekwatho monandjokwe nonda nyolelwa omiti kukuku Helene iiwike noomwedhi olwindjilwindji. Osho sha kala ngaaka sigo omomumvo 66 sho nda tulwa moshipangelo muAguste. Onda pangwa nohole nuudhiginini kaapangi nokakwathi yawo. Osho nda tandwa nongashingeyi otandi fudha nawa. Onda mu pandula unene molweyakulo lyeni. Omuwa ne mu pe oonkondo neyambeko.

Aili Hilma Tomas,

Jakob Shihituleni, Windhoek, ota ti: Ohandi hambelele Tate Kalunga omolwoshifo shOmukwetu, osho tashi talele po efimbo nefimbo ovanhu medu letu alishe. Ohandi likola mo eendunge dihapu. Ohandi pandula yo ovo have tu tumine Omukwetu. Omwene ne va punike.

VATI KONYOFI "MAWILA" OKUPYU

Pasadena.- Onghulungu Omwamerika umwe ovo hava tuka mombada, okwa hokolola kutya, konyofi oyo twa luka mOshikwanyama "Mawila" nomOshindonga "Magwila" oku noupyu uhapu. Osha monika, eshi va tukifa oshitukidila shokukonakona popepi naMawila, osho sha yandja kedu kutya, kuMawila oku li ngahelipi. Onghulungu oya tonga moshoo-ngalele shimwe ya ti: "Omunhu oto hale okutya, kuMawila oku nelambo loheli, osheshi oku noupyu muhapu."



Aadhanitanga Aawambo mOmbaye otaa ti: Tse ohatu dhenge etanga, ihatu nyanyelwa!

UUNA NDOKA AAPOLOSI INAA PUMBIWA WE

Owa tseya tuukutya omasiku omawanawa otage ya mbala? Uuna omasiku ngoka tage ya, okukalamwenyo otakulundulukile shaa ngoka. Naapolosi yoyene yene itaa ka pumbiwa we.

Ngashingeyi otwa tseya, omolwashike twa pumbwa aapolosi. Ano sigo oompoka aantu mboka taa longo uuwinayi ye li po, otu nokukala naapolosi ye tu gamene kaakolokoshi.

Ihe omasiku omawanawa uuna tage ya, kape na ngoka ta ka hala okulonga uuwinayi. Shaa ngoka ota ka hala okuyakula omukwawo.

Ngiika wa hala okupula: Omasiku ngoka ota geya uunake? Eyamulo olyo: Omasiku omawanawa otage ya mbalambala. Jesus okwa tumbulile: Ongame otandi ya mbala. Jesus ota galukile mbala kevi ishewe. Olyo esiku shaa ngoka ta ka hala okukwatha ooyakwawo.

Kalunga okwa vulwa omauwina-yi ngoka taga ningwa mokati kaantu.

Kalunga okwa geya molwootamanana nomalugodhi mokati kaantu. Okwa geela iifundja, mbyoka hatu yi popyeni olwindji.

Kalunga okutu uvitile ohenda.

Kalunga okwa geela mboka haa yaka iinima yaantu. Okwa geela mboka haa li nohaa nu sha pitilila poompumbwe dhawo. Kalunga oku uvitile wo ohenda mboka haa kala moluhondelo.

Esiku ndyoka otali hedha popepi, sho Kalunga ta tumu ishewe omwana kevi. Ngele ethimbo ndika lya thiki, muuyuni otamu kala iita. Ndishi iita opo yi li ngashingeyi oyindji muuyuni? Jesus oye ta ka hulitha po iita mbyoka. Kombanda yevi ota ka tula ko ombili ishewe. Aantu ayehe ya longo uukolokoshi ote ya kutha mo no-taa falwa megeelo.

Mboka ya longo uuwanawa otaa mono elago. Jesus nota ka pangela aayuki. Owa hala okukala naJesus kevi ndika? Nenge wa hala u ka likole ekano molwiilonga yoye iwinayi?



Nge to fiki kuKongo, moluumbo lo-vatumwa oto mono ekulumanya olo la pangelwa keengudi. Omakeva omafele okwa upikwa kemanya olo. Ngeno omakeva nomakatana itaa upikwa, ngeno eefuka domoushilo, omo oshilonga shetumo movayebele kuKongo tashi longwa, ngeno itadi pondoka.

OOTONA 16,000 DHIKULYA DHA TUMINWA KUINDIA

New York.- Iikulya yuudhigu wootona 16,000, ya gandjwa kEhangano lyokusila oshimpwiyu aanaluhepo lyOngongahangano yAakwaluther muuyuni, oya tuminwa aanaluhepo yomuIndia. Oshinima osha tokolwa kewilikongundu lyongongahangano mombinga yeyakulo lyoohepele. Iikulya mbika oya tumwa ko nooskepa. Aanamutimahenda oya gwedhele ko ishewe iikulya noshe eta omwaalu gwootona adhihe pootona 25,000.

Iikulya yimwe oya gandjwa kepa-ngelo lyAmerika, ya tuminwa ooskola, omaputudhilo omanene niilonga yehumitho komeho muIndia. Aanamutimahenda otaa gandja natango.



Ounona meongalo Okatope ova nyamukula omutoolinghundana va ti: Neudo otwa lya eenyandi twe di kuta. Kalunga ohatu ku pandula ta!



Ino kala nuuntsa!

AANASKOLA YA TALELE PO OMAHALA

Oskola yaanona yokEkamba oya ninga osheendoilongo (studiereis) eti - 15. 9. 1967. Osheendo osha li naana 38 yostanda IV-V. Naalongi yatatu nomukuluntu gwoskola.

Ongula manga inaali dhuma, otwa ningilwa owaandaha. Opo ihe twa thiki pUukwangula, opo twa tsakanene na tatekulu "Mundumbu" (Silas Iipumbu) namushanga gwooskola dhUukwambi. "Onguwo ya mona nduno omuzali."

Ongepathimo lyeho, tse opOshakati: Eha twa talele po tango ofabrika yiipilangi, moka twa tala iikumithalonga nkene tayi longwa komashina. Otse mbe pegumbokefi lyongerki. Omo twa adha tate nameme Dumeni ye tu taamba nomaako gaali: Eha lya landula opossa, moka twa adha ndi tye aalongi. Otwa yi mootundi nana ngaashi poskola. Otwa longwa ayihe haa longo mopoosa okuyakula omuntu manga e nomwenyo. Otwa pewa ompito yokupula notwa fatululilwa ashije.

Otwa tsikile ondjila yetu sigo pomatungo ga komufalandjayi muS. W. A. Shoka she tu mana ongulu yiigongi yOwambo ayihe. Otwa fatululilwa nkene ongulu ndjika tayi vulu wo okuyakula iigongi yilwe ngaashi iigongi yaasita yongerki ayihe noyaa-longi ayehe, shaa tashi indilwa kuye. Mpeyaka aanona ya tala wo omandhagandhaga mokamba yaapolosi.

Oshakati sha kala po, tse okokateya manga. Ongoholo, tse opOndangwa; Otwa thikile pombelewa yaapolosi. Mpaka otwa taambwa nenyanyu shili. Twa kundwa paveta ongaanenentu ya simana. Konima yekundo twa hokololelwa iilonga yuupolosi koshigwana. Twa talithwa oombeleva adhihe dhoka omuntu ta yakulwa pamukalo kehe ngele oye mwene e ya nenge ongele a kwatwa muukolokoshi. Twa tala wo ondholongo yokuyakula ashike manga omuntu inaa pangulwa oondholongo dholela odhi li ashike aniwa kUushimba.

Taa, otwa li nelago. Otwa tsakanena po naapolosi yaPretoria aahiki yomankuma (orkes). Oye tu hikile omankuma nihiikomwa yi ili noyi ili yetu.

katu yi shi. Taa, ando wa li pomwene. Kashi shi ku lombwelwa mukweni. Otwa yakulwa wo kombi-nga yenota. Iipakete yonamunate katu yi shi. Konima aakuluntu yetu oya pandula. Kaptein nokwe tu laleke.

Otwa tsikile okutala oombeleva dhakomufala, oshipe mpaka ondjugo yepangelo. Mokwiimba kwetu omusamane gumwe omutiligane a kwatwa shili nokwe tu indile tu ka imbile ko yinamweno omukulupe nomukulukadhi gwe kaandjawa. Osho twa ningi. Katwa li tu nuudhigu moku shi ninga. Okuza hoka otwa yi kaataleli yooskola dhetu. Ai, osheendo tashi dhana nduno. Ongolupandu omunona kehe a pewa okate-nditho ke mwene.

Otwa piti wo pombelewa dho-shilongo shAndonga moka twa adha tatekulu A. Shilongo namushanga gwoshilongo nosho wo amushanga gweeskola. Oye tu ulukile ayihe yiilonga yawo. Oshipe ombelewa yomukwaniilwa nomalenga ge omugoyi.

Mokupopitha tatekulu Kiriana Amupolo "Taute," opo twa adha Ndjima ongo kwe tu tega. Tala, u tale nduno sho sha longwa, oshitele-kela showala, omiya dha pama nduno. Omolwetango lya toka, Ondjondjo yo twe yi pe olumoho tu kiihakane Oshinyanyangidho kOniipa. Lagonene opo nga twe ya adha inaa pata. Nando etseitho lyetu lya kanene mondjila, oye tu taamba nenyanyu. Twa tala omashina gi ili nogi ili taga longithwa kolusheno ongopofabrika yiipilangi. Oshili omuntu Kalunga okwe mu fupipike owala kashona kaa thike puye. Shaa wa tala ombapila ontokele to sigo oke-mbo tali tulwa omapeko, ngiika ngwe wa pwa.

Twa shuna lwanima tu ye koombelewa dhongerki. Oshikumitha mpaka omesium moka twa mono iikulunima yOshiwambo. Otwa talele po wo egumbo lyomumbisofi. Kuku A. Auala naamati oye tu taamba nenyanyu kaali shi ku tumbulwa. Twa tala egumbo lyoopala. Kuku Auala e tu hokolele pafupi kuSoomi, nkene aanona wo Aasomi haa ende ya zala yoopala notaa gongala miigongi. Taa galikanene wo aagundjuka yongerki

Onandjokwe nOlukonda omolwethimbo ya hupu ko. Twi idhenge epola notwa shuna kEkamba lyetu. Sho twa zi moshihauto twa imbi Kalunga tii ku hambele notwa pandula aayendithi yetu notwa yi kogumbo nenyanyu.

Risto Kueenda.



Omulongiskola Risto Kueenda



Aanonaskola mboka ya li mosheendo

OVANHU VATANO VA WILWA

Cliffside Park (New Jersey).-

Onduda nomakuma ometungo limwe moshilando sha tumbulwa oya mbolokotela poshi novanhu vatano (ookadimamundilo) ova tuvikilwa filunde va fya. Etungo ola li tali pi komundilo nde ookadimamundilo (brandweermanne) ve dule 100 ova li tava dimi omundilo, eshi ekuma la ngumuka.